

HITZ BITAN

EUSKARA . Eusko Jaurlaritzak bosgarren urtez egin dio eskaintza Ikasi

BOB EDME

Ikas elkarteak 5.620 liburu banatuko ditu eskoletan

Eusko Jaurlaritzak, bosgarren urtez jarraian, euskarazko liburuen eskaintza egin dio Ikas elkarteari, Ipar Euskal Herriko hiru hezkuntza ereduak eskolatan bana ditzan. Orotara 321 titulu eskaini dizkio, eta bakoitzeko 17 ale, hau da, 5.620 ale. Liburuak haur zein nerabeei zuzentzen zaizkie, eta mota anitzetakoak dira: olerkiak, na-

razioa, eleberriak eta bertze. Hauen artean jatorrizko bertsiok zein itzulpenak daude. Liburuen emaitza Ipar Euskal Herriaren eta Eusko Jaurlaritzaren epe luzerako elkarlanaren ildoan kokatzea espero duela adierazi zuen Miren Azkarate EAEko Kultura sailburuak. Liburuok 2001eko literaturaren uztza zirela azpimarratu zuen Azkaratek.

DROGAMENPEKOTASUNA**Hontza San Anton elizara eramango dute urtarrilean**

Erredakzioa | BILBO

Gauetan drogazaleak zaintzeko ardura daukan Hontza zentroa San Anton elizaren azpian dagoen lokalera eramango dute urtarrilaren 1ean, Bilboko Udalak eta Gotzaitegiak atzo adierazi zuten. Hontza zentroa Zamakola auzoan egon da orain arte, eta zabaldu zuten egunetik, gatazka handia izan da bizilagun talde batekin. Egoeraz jabetuta, Bilboko Gotzaitegiak —zentroaren arduradunak— esan zuen San Anton elizara eramango zuela Hontza 2003. urteko urtarrilean. Horretarako, hitzarmena ere sinatu zuen Bilboko Udalarekin.

Urtea bete ondoren zentroa beste norabait eramateko konpromisoa hartuta izan arren, Zamakolako bizilagunek protesta ekintzekin jarraitu zuten, ez zutelako hori gertatuko zenik sinesten. Atzo, oster, drogazaleak zaintzeko zentroa datorren

hilean San Anton elizara eramango dutela berretsi zuten Udalak eta Gotzaitegiak.

Bizilagun «gehienen» jarrera txalotu du Udalak

Zentroa zabaldutakoan hartutako konpromisoa egia bihurtu ahal izateko, pertsona askoren laguntza behar izan duela aipatu zuen Bilboko Udalak. Hala, San Anton elizako arduradunek, inguruko dendariak eta Caritas elkarteak egindako lana txalotu zuen, «beraien ahaleginari esker ezin izango zelako aurrera egin». Zamakola auzoko bizilagun «gehienen» jarrera ere goraipatu zuen Udalak. Esan zuenez, Hontza zentroko langileen eguneroko beharra «erraztu» dute askotan bizilagun horiek.

Halaber, Udalak gogoratu zuen kale gorrian bizi behar duten drogazaleei babesa ematea eta zaintzea dela Hontza zentroan egiten den lana.

LANKIDETZA**Eusko Jaurlaritzak 600.000 euroko diru laguntza emango dio Angolari, osasun eta hezkuntza azpiegiturak sor ditzan**

Eusko Jaurlaritzako Etxebizitza eta Gizarte Gaietako sailburu Javier Madrazok atzo Malangen (Angola) adierazi zuenez, Eusko Jaurlaritzak 600.000 euroko diru laguntza emango du, Angolan bertan hezkuntza eta osasun azpiegiturak egin daitezen. Diru laguntza horrekin, 500 ikasleentzako lau eskola eratu nahi dituzte. Era berean, 350.000 pertsonen arduratuko den osasun-etxe bat, hezitzaileentzako bi azpiegitura eta 100 haur hartuko lituzkeen umezurtz-etxe bat eratu nahi dituzte. Eraikin horiek, Caculama, Kela, Lombe eta Gayatoko misio katolikoetan jasoko dira.

ETXEBIZITZA**Iuren ustez, PSEk zazpi urtean baino askoz ere lan hobea egin dute eurek urte bakarrean**

IUko parlamentari Anton Carrerak PSEk Eusko Jaurlaritzaren etxebizitza politikari eginiko kritikei erantzun zien atzo. Karreraren esanetan; «guk gobernuan daramagun urtebetean, eurek igaro zituzten zazpietan baino etxebizitza gehiago egin ditugu; batik bat, alokairuzko etxebizitzak». Haatik, PSEko parlamentari Jesus Lozak atzo adierazi zuenez, «egungo etxebizitza politika mantentzen bada, pisuen arazoa ez da 20 urtean konponduko».

ADINEKOAK**Adinekoentzako egoitza berri bat inauguratu dute Donostiako Intxaurrondo auzoan**

Aita Etxe izeneko adinekoentzako egoitza berria inauguratu zuten, atzo, Donostiako Intxaurrondo auzoan. Zerbitzu pertsonalizatuaren aldeko apustu garbia egiten du 27 lagunen-tzako tokia duen egoitza berri horrek. Intxaurrondo auzoan kokatuta dago, eta XX. mende hasierako etxe birgaitu batean dago kokatua. Berritzearekin batera, XXI. mendeko teknologia eta erosotasunak erantsi zaizkio. Halaber, Aita Etxek 650 metro karratuko belardia eta 100 metro karratuko terraza ditu.

GARRAIOA**Eusko Jaurlaritzak 36.000 euro emango ditu, Legorretan kamioientzako aparkaleku bat egiteko**

Garraio eta Herrilan sailak 36.000 euroko diru laguntza eman- go du, Legorretan zama handiko garraioentzako aparkaleku bat eraiki dezaten. Alvaro Amann Garraio sailburuak eta Xabier Iraola Legorretako alkateak atzo sinatu zuten lankidetzaren itun hau. Aipatu aparkalekuak 12 kamioientzako lekua izan- go du. Oraindik eraikitzeke dagoen bigarren faseak, kamioientzako garbitegi eta bainugelak edukiko ditu.

ELKARTASUNA**Nafarroa Elkartasun Saria, Karitateko Alabei**

Karitateko Alaben Kongregazioak jaso du Nafarroako Gobernuko eta Euskadiko Kutzak elkarrekin banatzen duten Elkartasunari Nafarroa Saria. Kongregazioa behartsuenen alde lanean ari da 120 herrialde-tan. Hau da sari hau banatzen den bigarren urtea. Iaz, Muhammad Yunusek jaso zuen saria, garatzeko bidean dauden herrialdeentzat mikrokredituen sistema sortu zuena. Aurten 25.500 euro emango zaie sari-dunei, baita Oteizaren artelan bat ere. Karitateko Alabak 1948an dute jaiotze data. Urte hartan Indiara iritsi zen Ama Teresa, eta han hasi zen behartsuenen alde lanean. Egun, 3.600 lagun daude bertan.

BERMEOKO UDALA

IRAGARKIA

2002ko irailaren 27an izandako Osoko Bilkurean, Udal honek "16.2" (Matxitzako Bidea) Exekuzio Unitateko mugaketaren aldaketari hasierako onespina emotea erabaki dauanez gero, 15 eguneko epean eta egokiak liratekeen alegazioak aurkezteko, jendaurrean jartzen da.

Bermeon,
2002ko abenduaren 3an

ALKATEAK

EUSKO JAURLARITZA GOBIERNO VASCO

Kultura Sailak diruz lagundutako egunkaria

Osakidetza Servicio vasco de salud

EPE

2002ko ENPLEGU PUBLIKOAREN ESKAINTZA

Azaroaren 23an eta 27an, ondoko zerrendan agertzen den kategoriaren probak izango dira Osakidetza Erakunde Zentralean (Alava, 45 - Vitoria-Gasteiz), Osakidetza-Euskal Osasun Zerbitzuak deitutako aukeraketa-prozesuaren barruan:

DATA	ORDUA	KATEGORIA	ARETOA
02-12-23	12.00	ERAKUNDE ZENTRALEKO IKERKUNTZAKO UNITATEKOAK (1. ariketa)	Alexander Fleming aretoa
02-12-27	12.00	ERAKUNDE ZENTRALEKO IKERKUNTZAKO UNITATEKOAK (2. ariketa)	Alexander Fleming aretoa

Aretoa noiz irekiko den: Probaren hasiera ordua baino 15 minutu lehenago.

Aretoa noiz itxiko den: Aurreikusitako orduan; proba hasi ondoren ezin izango da inol sartu. Informazio gehiago behar izanez gero, Osakidetza-Euskal Osasun Zerbitzuak Giza Baliabideetako Zuzendaritzako Hautaketa-Zerbitzura jo dezakezu, telefono hauetara deituz:

• 945 006 004 • 945 006 176 • 945 006 150

www.osakidetza-svs.org